

霜紅龕集

霜紅龕集卷四

陽曲傅山青主

五言古

蓮甦從登岱岳謁 聖林歸信手寫此教之

我十五歲時家塾嚴書程眼界局小院焉得出門庭今
爾十五歲獨此重小丁老病岱宗覽許爾隨之乘 先
師小天下亦於此焉登登此不自振虛俯齊魯青嵯峨
藏礪硤疏松嬾霄冥聊堪棲海鶴小鳥傷短翎培塿茂
小草但足藏蒼蠅人松不人草後凋已自徵況松乎泰
岱結根萬仞嶒奴人難攀援神山蔭崢嶸小書不屑讀

小文焉足營凌雲顧八荒浩氣琅天聲瞻言 聖域近
汶水龍奔騰循循歸洙泗春融曲阜城宮牆蒲伏進有
嚴司寇型紳圭赫暄下想見夾谷盟豎儒不此究素位
時中鳴三字微管仲動引喧經生唐碑崇丈五兩兩峙
舟亭檜北雄一碣獨罹地震掬有字駁難識撫心領師
靈爾愛五鳳字戈法奇一成當其模擬時髣髴遊西京
風期亦如此日上極所能 聖宮以立命泰山以危行
環顧熙攘者囂囂爭榮名日子長樹葉千秋信自轟

作字示兒孫

作字先作人人奇字自古綱常叛周孔筆墨不可補誠

懸有至論筆力不專主一臂加五指乾卦六爻睹誰爲
用九者心與擊是取永真遡義文不易柳公語未習魯
公書先觀魯公詒平原氣在中毛穎足吞虜

貧道二十歲左右於先世所傳晉唐楷書法無所不
臨而不能畧肖偶得趙子昂香光詩墨蹟愛其圓轉
流麗遂臨之不數過而遂欲亂真此無他卽如人學
正人君子只覺觚稜難近降而與匪人遊神情不覺
其日親日密而無爾我者然也行大薄其爲人痛惡
其書淺俗如徐偃王之無骨始復宗先人四五世所
學之魯公而苦爲之然腕雜矣不能勁瘦挺拗如先

人矣比之匪人不亦傷乎不知董太史何所見而遂稱孟頫爲五百年中所無貧道乃今大解乃今大不解寫此詩仍用趙態令兒孫輩知之勿復犯此是作人一著然又須知趙却是用心於王右軍者只緣學問不正遂流軟美一途心手之不可欺也如此危哉危哉爾輩慎之豪釐千里何莫非然盪拙母巧盪醜母媚盪支離母輕滑盪直率母安排足以回臨池既倒之狂瀾矣

跌雪起二章

久閉眼亦嬾逃字如蒙童孤山獻春色淡墨誰能濃守

黑白陰符知白眞吾宗

神顓叅太始淨義不可署瓦鼎薰蘆芽一縷亦無住遙
遙蘭村鐘帶雪落高樹

方山

壽陽

方山方如墉埤堦列疏松日莫俯諸山蜿蜒盤紫龍黑
陰作老虎鬚髮搖天風般般亦佛子山僧無過恂長者
載經至七尺何其恭

碑夢

古碑到孤夢斷文不可讀我字噉獸大夢迴尙停睽醒
名臆萼婢是爲葵之蜀炎漢在蠶叢漢臣心焉屬奉此

向日丹雲翳安能覆公門雖云智須請武侯卜

青羊庵

菴蹲岫蟠松林中故名後改霜紅龕以秋季樹草葉色胥紅也

心隱亦傷厚況復肆其簞多所不忍道豈復勝篇章流連鄭衛詩使人不能狂澹靜陶處士乃有詠荆卿劍術惜其疏舉杯飲欲忘重離不可解頗異山谷黃

賤夫美一睡一睡起宛渾至於濁醪有妙理而乙之

賤夫美一睡一睡起易美方剛惡人臣老來慚人子皇天不解劍仰卧切冷齒高陽老狂生邂逅惡苛禮儒冠本溺器不蓋戴圓恥新室九祭酒皆漢明經氏中興一瘦羊史冊景星擬惆悵六經澤如斯而已矣晦名早荒

宴看破此輩伎不直一錢業五十春秋以以此憐游俠
膽識多豪舉孟公鴟夷居誠擾諷誦鄙不知槐里兵實
和東郡起豈不擾三輔三輔尙誰枳嘉威於此侯大負
滑稽豚意中之俠腸向背復不爾泛濫詞人場性情月
露昧吾宗清泉剛樂府諛無俚惟庸蜀一篇名義嫵君
子聲歌辱鱗彤丹青掉狗尾諸無忌憚兒正自操觚喜
侯門頌仁義倡和代穀改何怪魏蛺蝶南國島夷詆薄
言此小技何益眞人裴半句不刺眼珍重玄黃篚風教
存其中豈敢遺葑菲森園者何人寄詩簡自姬編中三
致意東晉諸名士豈伊秦有人心肝未全死痛攬無衣

什茫茫一河水稚恭自有志起疊壯孤矢士稚實高才

河南畧經紀天意薄司馬憂瘁折梗梓獨憐老越石智

勇未愷悌姬衛自北來有用兩敵壘不能朱訥忍憤憤

沒安悔昨到桑乾河城問莫含址一人非長城忠義閃

漢底

晉方言謂落空曰閃

情滿詩慇懃庭虛嘯涕聞子好談兵

無乃陣圖紙得意真能游豈復責泥滓敢揮彥先

顧扇

何忌令思毀石奴功當成次倫

朱序

陷或使反經多權

奇幽巖有知己西方多若人老夫念佛耳念佛念佛念

人名

計行其有多永興護小慈索顥磴磴侍滎陽好奇

捷中原竟榛否流連古今事意何難可只導引學神仙

傷此筋骨靡生有不欲長藥有不屑餌靈丹來賊鄉柳
公弃如茵方寸亦何裨充類義爲談好我有祕方詒之
救衰餒傳云多奇效都堂常御此又云甚犒功服之得
清社撫心不敢嘗福薄久自揆僭妄一刀圭褫奪千神
鬼卽如葵藿園原不受蠲劉名山多蘆草儘得爲黃綺
但能學老續業寓春秋旨謁抵白石都銅錕自我里亦
能九十七不聞儲菊杞幡然顧心腸又非木石比此心
誰可聞私告六字母先是感異夢開士懇牖啟六字屬
熟持旣熟荷得去瞿然撿金祕咒名驚一視是臣意中
言佛故隱躍指以茲誓愚誠禮誦餘生已誦餘飲食外

口眞樹網似無聊頗作詩不諳古近體操筆取懷抱花
月翻我悵瀕洞蕭槭來莽蒼千萬里極知生有涯微情
渺無涖蕩蕩老嶢廓脉脉消湖海知所無奈何大命安
眞宰文武遞益益仕宦等奴婢器各受所容志卽榮厥
委神竅一哀章孟佗多祕譖氣類歆錦羊天地厭簠簋
此事不得與豈關一老侶行行漸掃除咄咄誠糠粃局
外洞倚伏大冶毒張弛誰何送酒來甘苦都唯唯餅壘
無小大列案撤書史向衡少別腸倦極那花暑清客不
可爲繩牀倒昏蘂一盞得一瞳花眼明如洗淖馬周老
來關門殺某駛勝負總不計定勝如神旅又憶杜陵言

濁醪有妙理

耐貧

六極列貧弱救貧還得強世晚習氣賤多令本業荒日
鋤一畝暇晚飯六碗香天與此骨力豈是窳劣郎顧彼
驕強者氣皆奴婢揚一僕怨主貧此亦小人常憧憧晝
夜計若或登華堂恐落甕城諺乞兒空勞忙少年轉更
失與此同侪儂每見老及耄亦多苟且望胥臚置從來
喜勝園之唐公侯畧小節豈皆法秦房老杜贈人言讀
之不能忘一請甘飢寒不願飽煖傷悞失將帥意深慮
投人倭極知貧難耐耐卽醫貧方翁健知天意子強且

地僵薄薄舊田圃耕耘眞道場

河房

魏闕的的在江湖何爲心寤寐一河房欲依嘉樹林鷗
鳥豈易狎無生忍浮沈西山白雲外是吾峴峴岑何必
故鄉遊昔賢留佳音

病登西山縛倚爲轎

椅本木名今世以坐子爲
倚子義當從木從倚而省

縛倚作山輿伊軋鳴翫翫生肩不貫舁跬步大小舁
者苦無狀坐者心恒跳遇難先代相左右高低詔山花
多奇姿秋雲杳高妙兢莊如木神不敢恣意眺欹危入
村落儘供山姬笑不知笑何爲老夫靈府燒豈不負且

乘還來辱蘿薦久知有待煩況待二賢顧四大不自便
厭人安傻傲極知其非情罷矧未能饒苟且盡如此偷
安至命譙子威畧用李豈見薜荔誚元瑜中晉風秦山
藥非療遠情念謝艾亦復板輿僇知也真無涯時志默
相卧石磴入綠天頗覩精神超高松鳴青禽吾庵菴中
寫遂初一何難殊未得其要古今勞俯仰誅茆意彌劭

五言六句一人一首

王适冥於酒深醉無一言繪事老益妙蒼潤欲樗仙獨
牀二十秋一室壺盞干

陽曲

不知平水人謂吉生何如吾意石艾臚於焉德不孤袁

門於今日乃有兩博徒臨汾

伎倆亂益妙誰知其聰明敬天不敢用詩盡聊人情西

方之人兮蘆鶯梁先生陽曲

覽息眉詩有作

道心希微閒癡情復歷落此自吾家詩不屬襲古格細

吟五字中頗與王儲邈念我四代來文學代有作然皆

餘力及未盡塊堦橐從好負雄志先祖圖名從好彫蟲恥寄託

晨星見慕隨集曰慕隨堂先祖未曾有此名京山公傳詳之是否亦消索以我

所撫拾不解何遺落穆穆離垢翁先君自號離垢居士淡靜青天

鶴松雪發警句道要在幽壑下漚亦多篇先伯有圖名下漚大

都類講學軒昂而風流惠文大綽約

先叔祖御史公

我我獬廌

冠冕芙蓉鍔冢君無聲草

御史公子先伯有無聲草

高視三象閣

讀書齋中閣名

離合任疎放長須拈寥廓孝廉於杜陵

御史仲子顛

倒靨簷濩時復有短章紫霧障春箔同學嗤笑之以爲

無處摸大謬無奈何而今我與若目論有公道憐才不

苛虐一字半句間冷眼明肫臍寬法覲多遇往往遇不

著暗商此道微消渴難挹酌亂世多妄人萬丈自光燭

奴物共旗鼓公然山斗卓不知范陽美燕趙擅芍藥花

林緯鳴鶯翠袖嬌倚薄頓詒牛腰卷大發虎齒噉罷酒

忍嘔歔側耳向寒鐸是可異規否宏偏行已愕李杜不

作噓撫掌覩愴顙孟生謝唯唯縐眉費忖度作者今人
爾不管人生殞我輩三白反差免躋黥惡不喜爲詩人
呻吟實由瘼凝滯何難化運氣中乖錯一綫憑元氣陰
陽與盤礴晦冥得奇句潏然汗泊泊時復能少閒還復
理摩削自知愁是豎自知詩是鵠鵠扁救急策非長排遣

度今作亦不博名高閒書邃巖寥江北盡白丁南人習
欺魄誰能爭勝負又去多酬酢丁亦何必黑自信少彫
鑿當其所得意豈望人解獲近聞有評論碎細響蒿憊
翻憐其識見幾時得開拓嚼肉有大腸脂膩滿包絡與
之嘗橄欖酸甜遙遙睢眦心作好語於我亦何樂妙哉

不惹妬怡雲信牢落

河邊

白鳥歇新涼微蜩引秋唱朗月流柏端河聲在崖上若非所際爾吾心豈不曠

河濱

河氣可窗白生我心之虛淨義不可舉如讀高人書一嬾臣槃考十年君海隅山林容此老何微無蠅蠕

鳳毛之集一僮愚頗近道問得所從來因篤戒僕鳳毛花酒禪大陵之別調不無振人眼徽之以挖繚小堂切城陰是木不欲凋綠煙常不晴入門竟寄篠一僮

集四
離儻怡拾之撫有類茶酒粗給力惠者責其僣初見我
憐渠似不知啼笑幡然代渠憐我之天機剗瞠對相太
始有欲淺乎竅人旣勾喬禪禪得僮翫道氣可靜參
聰明皆不妙世界習所薄誰儻爾獨仰再來勸勿酤主
僕意可醕

夜氣四章

夜氣四端備羞惡尤峻嶒火土混沌中金木寒光騰
閒有漏盡牀上無尸腥凍餓相戛拊一志深鏤鏗
明日九月節霜氣流淒風蒼鷹磴勁爪駿馬搖疏鬣老
農舞連枷瓶罌愁不充萬類各有業雲中鳴孤鴻

生緣唯一齋死緣唯一埋終然負天地生死何爲哉鬼
伯不發蒙晨鐘捫心來嬋媛孰告予抱一聽其哀
白日照強顏朝氣亦纁黃詩書包長惡溝壑有不忘儒
生待堯舜甕牖猥稻粱孔甲抱秦恨慨然死陳王兩生
豈不笑亦各云行藏

講學

神易非禮書老生羣嚼糟聖言偶及此不敢離分豪玄
田妙畜義天在山中包何必不實有多識亦塞茅
劍須鋒者利花亦樹之蒨意氣吹萬有高才欠一迂無
情並無性不俠猶不儒龍川似水火其實知程朱

老眼

老眼苦溇痛每日強半閉春風動支蘭作嗽牽積氣尙
僂護右脇轉變遂爲腎隱几忍頻伸業性閑不去舊書
時一探迴復山海異塔院送錦函慈恩傳箋至不能待
明發瞬夕就陽諦開卷起衰顏正見秉彝貴要兄趣長
安人王屬唐帝卽此一趨向豈復猫狗薤悲彼蔑戾人
妄謂佛無地所以繙經表傷昔所朝僞未見法藏時法
眼琉璃吹忽憶王景略生死苻氏媚茫然昧神州公爲
司馬崇至今齷齪儒動自羌猛置老齒終年冷十六春
秋記崔鵠袒草竊類語串一致以其奴見解而爲僞點

綴符猛與石賓帖括如一事客秋到頻陽流寓聞一士
自居王佐才自許不可世不云我管樂津津捫蝨快豈
其囿于方欲鄉先達媿雨中搗口歸忍笑爲齒避大虧
裴和尙兩言豁肝肺今日腰痛減輒復此游戲再浸麤
仁湯少救麻沙翳

失題

文詞有帝業不屑媚茲脩擘頂放龍變雷雲轟九州蟲
蟻編摩誇老龍從不知道人啁嚻笑惚恍原如茲不文
亦已矣文須那伽似鈔撮姪掩博搬倉升勺取又有握
穴人升勺竊鼠侍妻妾分顆粒亦怙厥夫力大小分如

此性稱其命役蠅蚋聲耳耳精物本星星幽田閉無術
半聾偏能聽響竹起撲之刹那不混人殺生損佛性佛
性亦殺生閒寫至此投筆欲睡而蠅混來不覺爲王思之憤遂度響竹小言足喻大
聖人怒有憑掃蕩蠢非類誰曰非義仁掃盡無一言雄
文靜乾坤三元八會書龍鸞雲霞中世人不能識軒轅
朗朗誦

雪林讀左傳

雪林張姓陽曲人
庠生亂後爲僧

雪林好腹赤遇書無不讀初爲行脚時左傳擔頭束回
復施嘑噍嘉肴分段觸卒業向我言一字足以覆我問
字云何曰禮是其曰擊節領其慧佛子真不俗持是印

瞿曇斷不外道逐尹生無文竅作壞六經戮哀哉奴鄙
儒不如吾老禿寔茶供大嚼靈通毛孔馥

讀杜詩偶書

杜老數太息黎庶猶未康此輩自芻狗徒勞賢者忙追
憶甲申前日夕盼藜韉只今死不怨熙熙寶慶楊皮業
自應爾天地有大綱小仁無所用故林何必嘗所悲數
奔竄奔竄復何妨宴安不可懷仰屋無文章有恨賦不
盡頗異江生腸

壬子年下過紅土道場懷雪林雪林別時正解則

陽舊園一則

煙春媚暗年東風拂南岡雲情寧馨動早欲栽花芒老
夫無客拜雪徑來僧房幽唄不出谷煖地憐陶堂劈柑
過律師柑作蓮花香齋脾隨大衆潤益惡十方不知雪
林子何處饌饌噉草木縉舊都不化舍闔嘗今日真讓
爾奈何難一忘

離石邁鄆羽脩見我用天瑞先生韻詒右玄詩輒
原韻賡贈能押秦字無惡奇哉中且無論矣言
爾何人爲復一訓託玄轉致兼復玄責

康樂之詩曰本自江海人豈好先名實天子不得臣有
生同一蹶移是任大鈞嬾散畢所受無力清黃塵殘編

寄崑崙松垣圯不堪遠惟新亭集江南仍舊春嘗笑水
心劍獻于胡口汾穹廬塞大鹵唱和歎韻倫美人自蘭
陵遊戲葫蘆濱見我萬山裏楚然忘其嗔冷眼對瑤席
孤靜意自尊私推一榻寒有所不能淫蠶上謬相詡月
脇鏤白元六朝花柳市鬻雲馳天驕心魂動秀色頓解
圖罔昏知有白色河渺漭出崑崙百川受不溢柝木懸
風輪深情亦瀟瑟微言及韓秦大荒可同逝披髮騎騏
麟沆瀣堪漱齒曩髮可膏髻其如有身患我輩情爲藩
老周百餘歲趙遺俄來民其或得嗽珠於彼癡龍殯

讀虛舟先生詩

老氣壓全晉此道人嫌儉插花競雲鬢美豔終女郎曹
家無靡語何嘗少暉光鮑謝自妮人風氣南大江可憐
偏安習瑀組排天襄頗怪元暉子笑兀驚莽蒼大江流
日夜客心悲未央十字徑欲霸詞人誰敢當

柳

柳氣又黃透教人奈春何年光訓廉恥薪水勞巖阿老
病久自廢一槃安所適伊吾絕萬里壯士投身過

失題

寺園有桑樵老僧許我喫佳實在于顛扶奚上樹摘採
著與老夫不者衛鳥雀

壯夫恥彫龍文士學刺繡□□一箇家天地放不穀軒
轅看昌黎山斗須俯就

一代遜一代文章日不眞儘其所知聞銜之勢利人七
上八下才五角六張奔

黃君五味在不用酢益齟不拘口口戒芹苳芥皆可新
春嫩柳芽有香無煙火風乾當禦冬綠韻礪齒瑳山房
三兩筋蒸精仙飯顆

題慈節傳後

亂世死一婦歎霎眞微末不死再脂粉幡然有難活簪
并待賢媛蝴蝶潔如脫書袋漫操觚丹青莽鈔撮乃令

面目假識者笑塗抹大官省繁縟餅師與妓妓不爲喧
雲鬟束帛聊簪髻傳神正阿堵豈復來疑喝所以有道
碑中郎不媿汰文章有廉恥詞場亂可掇

乙卯中秋同王瑋王璟胡庭兒眉孫蓮蘇遊寧鄉
柏窠

今秋何秋兮乃從河之涯物外三四人帶情聊煙霞
薄得霜早蒼翠紅紛拏嫵媚領南國睥睨摘幽花言言
語語而行行來柏窠

翠柏嫵幽壑細雨騰秋香柏根輾轉鱗雲根畱一牕老
人忌清薄朝暾散林光俯批綠影入石房殊不涼坐久

神氣和貪書有蒙莊林邱之所善先令靜慧長礪礪出
蓓蓓可以弄文章

前窰多茂柏后窰復松林旣無樵蘇擾亦鮮腥葷尋高
步取微徑香綠滴素襟大石任坐卧古蘚天花茵何處
能喪我入林卽外身親知時一至相戒獨晨昏牕外有
虎跡牕中冥坐吟彪炳此畏友總勝奴文人

蘆芽山徑想酒遣劇

緣來無雲樹山溪淙淙中老樹倒爲橋綠毛僵古龍遇
壑起疑難卜度將焉從批林得微徑愈覺獨往雄一轉
迷黝黝峰峰爭鬱濃無第亦可畏隨復慮有窮天藍漏

樹罅藥苗穿雪紅採藥啗素雪紅玉呵洞胸冷豔駿花
眼神上青芙蓉想酒勞犢鼻焉得村醜醜晴空映丹棖
琥珀光瓊瓏想極如活見翻悔不專傭柳栗雙紙來醉
死林花叢昨到北溝灘南山筆閣從我已喪灘外不復
戀老農瞻言藏酒者六百里之東蒿亭枕麴卧有酒無
山松豈念蘆芽山渴死僑黃翁移志玩衆妙鳥語林黃
聰嚶鳴皆有侶益傷鮮我同名山亦何限禽向唯雙蹤
四子者安往汾射留元風糠粃至今在佳氣窅鬱蔥林
邱誠大善雷電殷翦翦天聲到巖岫青綠凌霄狝深情
岐中岐題詩不知終

偶錄五言古一章諄復圖寶不似詞人之作

生死卽旦暮男兒無故鄉血丹中土碧骨白高秋霜德
繳信竭竭圍觀豈茫茫吟諷本無用痛快空文章魏闕
何處熱江湖心自涼美人遲遲來徒誦水中央父子俄
然別君臣恐難忘春陵漫蔥鬱斟灌當誰望浮沈三十
年何日不膽嘗神孫遽武健如意祝文昌靖籌翼軫旗
天兵壯繆將一杖生不扶墓醕中興觴數當撇捩盡奈
何乖義方恭忝皇天玉其諸有不茫我死非允吾五噫
爾其遑瘦熊省經白老牛矢執黃據地吐盜食咯咯爰
旌吭嗎然決於心豈復容再商秦風悵衣澤楚騷悲沅

湘筆墨有前車巖谷固厥藏華甸陽馬死麗藻爭虎倂
老我目難瞑子孫眉翻揚變局忌傷性暗喜仁能當橫
流有疏鑿豈其終懷襄

題自畫老柏

老心無所住丹青莽蕭瑟不知石苛木不知木拏石石
頑木不材冷勁兩相得飛泉不訾相憑凌故衝激礪礪
五色濺輪囷一蛟軼寒光競澎渤轉更見氣力擲筆蕩
空胸怒者不可覓笑觀身外身消遣又幾日

遊樂平石馬寺

愛石卽欲死礪礪而扶疏天華蒸太始古菊千葉數采

采日月菁飢殍渴亦荼心肝藉貞氣物外保廉隅何處
雲根罅不堪埋老夫

斑璘石上華青綠硃砂塗沈吟計年代豈非天地初何
有於商周屑屑誇尊壺文章落言句真彩日受污偃仰
玩自然寶色當其無耶蓋赫筆硯經緯省拮据彫龍競
藻績轉眼亦土苴雲霞幻鸞鳳神仙誰窺圖

老櫟頂石出樓榭黑蚪鱗寒情拖勒豁冰霜無枯榮黃
葉凍不落風捲金石鳴倚薄呷苦酒衰顏紅稜稜拏攪
慙筋骨膈臆勞呻吟奇語琢肝揭不掃神州塵終供勁
卒笑常談之老生

寒月課兩孫讀左氏傳

西山凍玉牆寒光明舊書瓦鑪焚柏丁袖手不能舒兩
孫戒犯寒聊復佔畢劬左氏世所習上口當賦芋調饑
是足飽貧兒氣爲麤誰知茅簷下日厭大官廚

不想

不想寐有覺何人傳天聲嘉名自天命神孫日用亨宜

樹意有無胡爲撩魂停謬命久自安三獸示箕陵

庚辰秋夢

據箕子陵有三獸守之

國難實原筮大易凜神明一得雉膏塞再

得盤桓貞臣子心難灰爻繇流連微雨復何所遇信建

誰亶膺窮壑一老叟諒非簡在明撫拾快朝飽車馬帶

覆傾田生抱奇策聊復干營陵地貨眞可惜蔽己非功
名聖人目望羊大盜睡不醒四海學廉隅百姓蠟榛荆
麻襦餽天馬江外終小成白頭待扶杖一豁遺民情

爲保德王君思作

東山有大膽初不在淝水當其入幕時府主爲元子可
惜嘉賓兒不與賭墅士

來青軒遲月

樹氣渲石鬢泉佩珊雲香娟月上南峯杏林飛夜霜鄭
虔荷氈至支遁下繩牀睇笑煩想像森森成曉涼

壯士

黃沙舞筍起榆柳鳴梧枝壯士夜不寐撫劍傾深卮貪
醉乃益醒瞠眼觀天儀仰視參中伐短縮當畏誰拊髀
復大笑天遠安可知人氣憚一鼓委天亦何卑不聞漈
水捷空中有鼓輦鷄鳴上馬去鼻頭飛素霓迴首天氣
肅旄頭爲之垂

失題

明月嬾中林美人來遲暮杯酒且斟酌自諦安所遇結
詒豈無言一水復難溯藁葬非允禪旁吾寧先顧果蘇
度淨命德繳覺臨數眼光落人間魂氣任之駐本非高
尙人形迹亂疑誣若早十來年猶能試露布筆花遭夜

合萬物一俯覩毒酒甘如飴巨游眞長慮合浦漆癩酬
任馮當何訴視息聽早晚浮雲澹空素

霜紅龕集卷四

霜紅龕集卷五

陽曲傅山青主

五言古

讀老子

河上義未圓使我爲經生依面未能離聊復如童蒙行
行進此技屑金於眼中伯陽老慈悲縫掖多刑名

薄禮階大亂無禮當奈何申商非道德棘儒庸餘波意
口尊其名少選是其時飄風不崇朝一宿蘧廬之損之
純厥儒又損達農羲同憂勞聖人剝復因道師平陽得
蓋公醕酒醉漢初

效唐人樵人十詠

復斧擔
二章

樵谿

翳翳雲不流，黑綠一溝谿。
水石恣藤蔓，斫伐見日月。
多少擔頭命，天植此生活。
相戒有山神，無犯古崖柏。

樵家

雲破茅簷出，雞聲在籬梢。
賣柴帶醉歸，一覺紅日高。
煬燂竈下歇，松柏香不消。
願瞻烟棹上，亦有春燕巢。

樵叟

骨勁虎風嘯，膚老龍松鱗。
春秋看斧柯，棫樸矜兒孫。
肩背有天命，林廊無佚心。
興亡不到擔，永言燧人民。

樵子

神全不知險敢上無徑崖舉斧聽雉雒放斧逐鹿孩日
夕懸爺心認得歌聲來除頑不算力一背山花柴

樵徑

月黑一線白林底林端縈木心信石路只覺芒屨平雲
霧遮不斷禽獸蹂不奔侶伴任前後不讓亦不爭

樵斧

斫乾信手拔斫濕時復留荏苒有不斷反責心手柔蘸
鋼大匠治磨礪高風秋鐵心將入山山中木魁愁

一段不仁鐵入山仁心流荒厓足枯朽誰忍方長謀脫

復毒蛇脊亦可猛虎頭高松不敢試惡木見如仇

樵擔

乾濕久戮力輕重不相猜風雪軋軋動步驟勻勻開筋
骨石中老精神肩上來多少脆弱中嗟此堅貞材
察理見直性轉換何便娟寒熱領恩義切劘聳雙肩
枒勤拮播爲誰挑火烟挑得是男兒放下真神仙

樵風

柴影照水面船上生林藪魚龍不相妬風似吾家有到
岸理薪束颼颼微在後大帆打鼓者尙在波心守

樵火

敲石引紅燄望望集徒侶空山種煖因圍煬相笑語手足暫舒展豈得久偃聚去去豎寒肩遺燼不再睹

樵歌

一聲林表度不知何者機四體怨尤盡渾消山谷淒百鳥聽真籟林靜和鳴低擔頭寒花朶不覺開蕤蕤

喜故人白生兄弟出家得戒

白生交城人

大怨不易和翻頌善知識借此天地根消彼蛇虺黑分明兩慧儒先後逃歸墨對爾懷雪林大肚蹇茶食拉搭無威儀遇書手不釋幾時小道場供養入流客我挾我老莊參同當莫逆晨鐘流荷葉恩親爾願力幸免北山

移聊復東林集拔我毒龍噴兩塊清涼石

病極待死

戊午六月

生既須篤摯死亦要精神性種帶至明陰陽隨屈伸誓
以此願力而不壞此身世世生膝下今生之二親莫謂
恩愛假父母愛我真佛謂恩難報不必問諸人

入涼暫爾醒快

戊午

秋陽朝便熱病軀已不任閉目壓驢背筋骨自覺沈南
甍醒清涼如夢入綠陰灌薄蒙紫露靜好壑壑深性命
知無益忍死欲披襟人生多憂患情事復交侵感此幾
步幽而況入深林蟬聲忙不斷高亮勝鳴禽大化蒼翠

閒石傍冥寸心何必勞喘息促迫逆旅尋

不如

戊午

一兒五十歲兩孫近弱冠都是好身手不能解憂患促
壓無所展坐歎復坐歎惟有心裏淚儘多背上汗不如
棟樑子筋骨甚能幹

旅次燈下屬孫蓮蘇信手拈二十四韻倡令眉和
遨游情事異莫概輕故鄉道心入煥地不消鬚上霜快
意期的的耳目混茫茫功業無丹青花草羞文章血性
不時熱不妄自謂涼專滯固傷慧散亂愚未央以此爲
往業再來期不忘夷吾能堅忍喜距總勿望氣運有羸

縮邪正亦何常陰符旣微露可以見其昌安排幸異夢
雀躍如雲將上帝於今醒久罷釣天鰲人間多庸醫無
膽習此方亂後無齒舌畏其放光芒當其逞辨才顧忌
有弗遑恥昧明作明離合黃馬黃勝負虛要害未開解
批吭巨伯妙漁利並高仍行商伐樹赭君山風波怒沅
湘無怪來狙擊橫暴氣不藏河北風沙間至今猶偃偃
誰能獵蝨魚馳騁爭飛揚穆之裁袴褶雖老堪一當君
看樹豹尾不減織七襄

艾僑小極作

時杭邊獨
有管子

極知病斯致病劇還致斯心在命爲外神攝形聽遺豈

卽見至理聊復憐微詞小枝有立箸麤士無實知知虛
合內外安往非眞其晦媒潔府待佳句無鑪錘波瀾香
古楮玉隴通華倪邂逅適然遇弔詭誰與期

老趣

孟邑作

老趣深自領弱喪將還鄉天地旣逸我豈得反自忙言
語道斷絕寤寐東吾裝早起聞霜肅矚矚明南岡素雪
籠紅樹奇豔茲秋光好語嬾一裁茹之時復忘卽此省
心法不藥服食方潞州紅酒來聊復進一觴憤憤待其
至負贅日已長

枯木堂讀杜詩

直隸崇文門外圓教寺

詩王譬仰文詞人亂佛子雲山花鳥逢眼耳心手以高
才一觸磕直下道者是好手擬中的活語被參死莊嚴
非莊嚴不似乃真似可憐無寸心得失傍故紙非非法
非法一燈室則邇

可憐

可憐一往業竟無慙同心翻令老夫痛不在一生今靈
光能幾許當得黑業侵業業轉加黑心心毒陰深于彼
未必螫仁根焦輪堪父母愛不及鬼伯屯稠林韓非亦
道師亡徵家國箴曲士警一語蓮花牙泥淖頑冥塞幽
田奈何哉德音受報永不覺妄謂魔力任太始清涼地

迷復無繇尋每誦圭峰偈結癰決一針不知不可勝瀆
武勞兵勦子孫習餘酷密唆刀頭淫奉之爲義方誓矢
同商參哀哉道日遠飽煥亦此斟

遇虎有作

辛酉寅月初三日黃風吼塊北御南岡棘徑跋躑取一
松黑墓門宿留蒼顏久枒杈枯灌中白額猙獰醜泡猊
呌欲撲狺狺躬抖擻何物獍獅兒藏茲鬼伯藪睥睨同
虬須慙是於菟呿徐步踰北隴迴顧想馮婦嬰非單生
色咒無赤刀口終年欲一見新春能邂逅漫語村少年
烏鎗叉棒走須臾見皮肉割剝衆人手翻悔口不緘豈

非殺生垢畢竟害人者殺之未爲負轟傳吾遇虎訊問
勞朋友驚詢選彼時何如心動否迴想加諦憶恐怖實
未有文章不彪炳聲氣雌咬狂攫搏亦自雄吾終以爲
狗不則梁渠類見之有兵咎天君至今靜遽居告子後
先本無戒心坦然亦其偶人生所遭遇非類未勝喜觸
目難爲羣何必在禽獸一以無機子瓜牙無地受其得
矜沈勇浪詡膽如斗徒然無忌憚怕處鬼隨妬山林多
不若椰標不豫愀

待死六章

老病不待說鞅掌玩死趣冰消水任流成偶何虧故作

息淺淺看勞旦而逸暮

誰痛復誰覲痛過覲何之極知痛爲假真覲爲提撕鈍
人無超詣快憤癡迴夷

生事都向外惟死乃近裏風卷浮雲去蕩蕩千萬里不
見天愛雲戀戀怨風駛

一拜 先師林皇皇知弱喪無窮繫表言一臂竟誰抗
雞足待慈氏未空壽耆相

生陳死又新來輕往一勇蒸變聽自然知覲有不動一
雙明髀子記著帶紅腫

淨名之園觀莊生之卵彈遷化無死生嬾人獨泮渙去

去阿那含不來阿羅漢

題昌穀堂字率意所及多蔓言不責侖脊

晉王善書自署

昌穀堂

一舞而見殺有唐食馬報歌工聲如雷霹靂哀號昂王

鄭高才士忍死戴紗帽貴賤意懸絕顛倒憤裹抱不謂

工書王黜黜邀賊笑不負臨宮池絳碑就將造

府寶賢堂帖傳

之摹自絳帖

始知北地王銜技少可耀不然何無俚淒涕哭

宗廟朽才分溝斷翻譽爲忠孝有能卽有濟天授此墨

妙兒子習琵琶指備身口道所利有大小得計則同調

宜乎畧有能惟嫌不治躍戴絃不輕鼓老迂昧歎導雪

林重寫人防人或有肖貧道簡金石念茲仰高蹈作字
如作人亦惡帶奴顏試看魯公書心畫自孤傲生死不
可迴豈爲亂逆要老倪眞倔彊未但言論峭糞船而燒
香不受張吳召

一作老倪死爲
元耳食東南噪

七賢祠

趙宣子韓厥程嬰公孫杵臼鉏
麴靈輒提彌明
忻州北門外

疎柏糝高楸哀陰古祠假簡樸顏七子眉目先進野宣
孟顏不舒受法無以寫韓子矜而恭意注舉我者膈臆
哉彌明殺葵怨未解桑餓釋菜色報德果然也還顧觸
槐人恬然噴怨寡公孫死旣烈豐溫像安暇爲事易已
了道腴自閑雅肅容禮程公癯慘神獨治保孤終下報

勞瘁量難舍惻惻流離子汨酌無盃幹乾坤此何時七
尺未狗馬龍髯不及攀前星暗天下亭毒三百年寰海
盡聾啞草莽惟一死死恐未瀟灑仰天看怒雲驚如義
旗哆

祠僧思風不能禮客旣令其徒以筆硯請留題貧
道怪其意曰聞名能詩許再復之因自歎有作
毛錐不殺賊吟情附雙淚男兒生何爲壯業雕蟲蔽悲
壯浣花老顛躋雍梁際忠憤發金聲誰識此公志當年
事如何哥舒失險備上皇樂游覽八駿馭西轡翠葆駐
蠶叢百靈擁仙帝靈武正飛龍四海仰新制行在尙可

達不負開關致元勳推郭李河山破復易口號記天誅
劍外喜收薊哀哉生不辰英雄遁何地絕裾懲太真棲
棲尸饗計知名不賣藥月露遂成祟投筆起吞聲雄劍
爲誰礪老衲好客詩七子知客意

棗下

兒童匝纂纂共嬉枝上繁引石打新紅一中羣譁諠野
老板樹哭顙顙天地恩飽德不知自浪嚼味亦單願言
計根枝滋培非一年請觀棗下井不改當時泉

頓邨舊家作

忻州頓邨

老屋簷弱樑中宵月漏亮四壁翠莓衣稱吾窮宅相須

眉負日月凍餓死何悵漢季一寒貧無聊與友尙華屋
豈不宜魂夢亦羞傍匈奴何與漢爲家恥大將寒貧東漢石林
號也

隣老攜酒過

亦解酒忘憂盃盤不敢舉隣老攜燒春殷勤陪辛苦辭
謝無峻詞但云偶病暑糟瀝請自斟意到不在醕坐看
梨面頰顏開計禾黍所慮惟飢寒此外無艱阻自憤善
憔悴何獨少樂土人生亦無幾盛衰自今古況復師漆
園烏蟻從上下委形付大冶舜蹠同一腐安用愁墜天
戚戚不歌舞聊爾憑曾樓一豁半年楚四塞放眼底忽

復淚如雨自悼誠小人茂弘罵中汝天高雲意閒望望
勞延茫

過先居士舊墳

在邑東山洪子峪遷西山馬頭水三年矣甲申八月

禾黍搖悲風高原日氣白
曖焉先子棲哀敬不禁集先
人之所依後人之所翼故宮
憫宗周臣子同一德嗚呼
此性情不共邳墟易守墳父
老存延坐問消息陶穴下
豆粥剝棗慰饑渴相視益親
厚如對父之客問我家何
方蕙畹亦難跡湖海牀自高
無心起蓬華悽悽隴首勞
未欲田舍覓一亭蹲亂山野
菊香可摘采之裹爲糧將
造山圖室

七機巖

孟縣藏山之口

勞人尋幽山青鞵破秋紫驀躋七機巖丹黃鞠荆杞美人化何之杼柚空久矣愁緒紛無端鈞綜將相死惜哉天孫堂不棲甕繭子富兒怙壑舟囊篋羶僊址白霓嬰肩吾豈任滕緘使金銀氣不藏肱探足自駛村僮貪煖飽比屋賁育起如赴君父難弱肉甘刀矢我來相鍛鑪兩人呻瘡痍相視發浩嘆何處無勇士戰場問國殤乃獨少如彼大盜容侯王鈎竊仇無已中原用劍戟偷生亦可恥向禽五岳游漢郊妙無壘

題陳十右立買得韓雨公所藏管畫

甲申

名畫滿兵市貪夫賁育搆管紙淡無色不顧慮難售一
士非新人識自秦園舊見之動金石饑餓忘葑後易歸
意何得似與園主邁俗奴昧此義真假滋訾詬或復貺
賞譏感傷爲管瘦手們心代驚幸畫無情竇願言爲畫
謝憐儂無地受即使眞有情娉婷從少疚藁砧嫁兩韜
習見未爲垢尙悔滅紅綠令人不驚走今歸故人筭得
無怨側陋

願旱

甲申
五月

雨浸人心熄旱燒翼復然燒之竟不熱心臭腥寥天願
訴祝融帝火龍揮三千烈焰吐一世燼此汚邪原大地

見高明蓄畬種聖賢皇天知好生安用禽獸填烈哉伯
益勳上帝俞其災桓宣記有年孔子尙不然

吾度夷齊心不惡肥遺蛇神州不生草誰當有室家采
采首陽薇豈能獨萌芽樂哉無可食早死心魂嘉

石河村與郝子舊甫

壽陽

須眉覩人臣瑣尾窺林藪尤恨爲人子宅親無安土簞
輿厯畏途捍禦力不赴驚入石河村通家邁舊甫老氣
率眞意避居寓吾母黃雞勸燒春新穀舂數斗墨突不
買柴稽稗足場圃飽我煖我者薪米見朋友飽煖吾老
親薪米過瑤玖事異閔仲叔片肝逃腹口飲德暗感歎

古人行處有徐徐蘊藉出筆硯精無垢見之如老農耒
耜委南畝野鷺意中翔不禁柔鈍肘流離潛荒野文物
安所取少年多才用子眞黃玉偶憶從黃玉案見子七
襄手機杼天孫花芳潔仙雪藕視彼時髻髮塗抹但畫
狗侘傺天步艱月露且無受青楊長玉林百株匝垣牖
卽此成小隱風俗况淳厚寒月到籬落清光浸邨酒沈
緜何用愁時郝病醉死快邱首北極望不眞涕淚日就老
蕭艾隨地榮蕙蘭惡羶臭彼其怕生促君子嫌命久

趙氏山池

風塵黯天地遄走惡遺跡符生志買山百萬難于頓棲

棲向子平因人問幽僻俄游天水鄉小壺一邱側入門
綠韻寒塘組菱花碧玳瑁簷玉鳴滴瀝哀箏擊中暘緒
如焚霜梨黃玉摘造席見番繪黑繒金代墨鴛哉一狻
猊降意馴羌笛邂逅何太親豈是好奇癖中原一陸沈
羞見神州客神魂安亂賊毛髮猙獍逆未如茲老番鬢
鬚踏烏革不必通詩書尙存古顏色撫心通畫情凡物
皆足役猛獸可教戰指顧妙組織唐京亂羯虜花門亦
需力所咎留不遺浣老吟詠戚爲問握機人此事將焉
極日月果重明豈愁聽聲策無端傷隱心小憇終成泣

趙壁懸畫一胡舞
笛指顧一狻猊

見內子靜君所繡大士經 乙酉

斷愛十四年一身頗瀟洒豈見繡陀羅悲懷畧牽惹卽
使繡花鳥木人情已寡況爲普門經同作佛事者佛恩
亦何在在爾早死也留我惟一心從母逃窮野不然爾
尙存患難未能舍人生愛妻眞愛親遲遲假焉知不分
神勞爾盡狗馬使我免此嫌偷生慈膝下紺緜傳清涼
菩薩德難寫

哭雪

臭土三千丈想雪如調飢羶霽生一葉惟恐風復吹無
端敲口霰瑟瑟鳴珠璣大器冰氏子故人天上來市井

難放𠄎選地山招提老松玉蚪立著寒添瘦姿折枝喜
代塵豎義理清辭皓結發中楚機動不自知暗念姑射
子何必復來茲忍以鮮潔薦委作塵沙泥雪豈亦無奈
舍此莫可之或圖田舍老諛訟春扶犁扶犁期一飽飽
死欲何爲儘可嚙子卿不必羶毛資誰深屈原淚玉米
如京坻

霜紅龕集卷五

霜紅龕集卷六

陽曲傅山青主

七言古

長歌壽楊爾禎老友

上章攝提格十月初旬十是爲老友楊方生行年五十
之生日僑黃適在晉水湄依我昔年結社祭酒程仲食
相與買酒烹羊略爲介果能不遠五十里衝寒謁來赴
野席日夕強飲飲不酣其中感遇僚侪之意彼此不言
各能悉寒月惻惻泉錚錚閉門相視明一燈道人自顧
形氣久蕭索靜睨長卿立髯紫面何精神吁嘻哉閱逢

涪灘以來七年矣凡在吾黨三五金石魄魂摧折誰欲
生爾獨何爲堅奈不卽老爾又不能日日割肥打酒追
頑冥獨吾算爾身中大有不死理天真渾淪自足醉飽
無庸烏申而熊經日者薦紳子弟罹賊難多少子忍死
父弟背兄楊家羣季有陷湯火者爾一聞風勇猛奔入
城見賊自言我是楊家冢子某有利有害吾當承引頸
受繫釋兩弟陶然待死無忤忤不知今日榜也明日殺
其心以爲兄不如是令弟死死日何以見諸清白先僉
兵卒之黥黑囚辱六十日不死而出昆季食貧雍睦少
怨憎客歲九郎復爲里胥毒引充鎗手隨胡營爾又涕

泣聞關左右走委心荏苒於非其類眞至誠九郎旣歸
兄弟慰勞如夢寐此時大親忘德無以鳴凡此至情至
性誰能爾是爲吾儒還丹復命之元靈痛念昔年吾亦
有弟被賊苦吾竄伏七亘山中平定州之山而爲怯肩縮頸
寒龜俯至今弟與弟幸各皆在兄亦時一與兄邂逅共
樽俎我兄有覲豈敢同爾兄天性厚薄懸絕天淵不可
數即使我有韓衆山圖藥令爾嘗嘗當如土是以少爾
尙六年精神筋力不得與爾爭良楮頃來吾弟依爾頻
爾拂塵甌飲之食之不厭勤迺知愛其弟者愛人弟源
深不竭波皆仁前日再飲汾河濬三日三夜隣雞聞吾

敬吾愛知爾會不死但須大口飲酒酣其純吾雖名游
方外未解事吐納填胸膈臆峻嶒秋殺少復春苦復登
山臨水旦暮未溝壑尙當竊爾太和餘靄醫吾三毒之
一嗔

長榆南崖之孤松

長榆南崖之孤松蓬頭老仙躬曲穹簡重不屑苦作峯
枯皮一片圈皴簷高綠重蓋低月宮抽風繹雪心不容
老人物色三年久望見欣然過回首想琢一讚字峒嶮
離奇殺了松不有向空一呖吹劍鈕幾時無情如吾松
乾坤萬事無好醜

松在壽陽北長榆河南崖偃蓋無多
枝奇老如畫松之身穿一孔遠望之

空明而正圓
奇爲古樹矣

邂逅看續宗老禪和打拳歌

金陵老僧曹國裔十八十九伏龍騎大黃一挽三十鈞
先登能鼓大刀氣殺賊爭功羞雷同叅戎偏壘銅骨致
猛念沙場殺鬼魂菴摩羅果迷根帶剃頭勇仗金剛力
抖擻蓬毛霜掃地朝山朝海四十年靜了於今七十歲
光頭矍鑠瘦不脩腕腰翹捷古獼猴曹陳頻婆順庵日
曹陳頻
婆汾州府佳果也別處無之紫鵝卵錚錚礪齒渣不留老拳技擊筋
磈壘臂稍指鋌風颼颼木劍到掌五步內觀者不敢傾
其頭舞罷雙趺似無足六虛匄子精靈收老人見僧氣

爲壯羸提甲裹真龍象綿筋弱骨假菩薩波摩當佛爭
迴向毛道沈淪彌戾車驚嶺鈴鎚終不撞願言拳頭大
須彌痛打衆生教淚垂痛極乃知叫父母方便托出蓮
花泥

石城讀居實詩淚下如雨率爾作

讀詩何故爾莫測淚從來吟者見真性會家能不哀酸
甘黑白傍味色眼睛齒舌皆奴才荔枝絕似江珧柱嚼
之不見但爲咍痛眞不用棒啼亦非關饑持佛之佛陰
盼霽自聞其聞陰霽開春風不使梅花笑梅遇東風不
及排

題自畫山水

天下有山遜之精不惡而嚴山之情谷口一橋摧誕岸
峯迴虛亭遲臞形直瀑飛流鳥絕道描眉畫眼人難行
觚觚拐拐自有性娉娉婷婷原不能問此畫法古誰是
投筆大笑老眼瞠法無法也畫亦爾了去如幻何虧成

迎春花 王戊立春作

僕皮迎春不作拏長年誰復哥穀他嚴寒落寞白雪里
稀疏開似黃梅花主人春盤無彩勝插向盤中春滿飣
影映村酒鵝兒茸朶零水餅鸚噤冰凡花淺心向人輸
此花之心深更無不向麗人雲鬢戴不期墨客吟咏污

集六
堅貞有恆正在此命寒情熱亦奈死不厠繁華嬌養羣
獨得我貴知希音

失題

龍腦膽脂藥何靈合以曹老心之誠一點陰翳不夾襍
持之醫陰胡不晴空青自是眼仙餌經無良手當加旨
提婆剎晴晴隨出由來不假瑠璃成每見孤立村市罷
雪林如戟無多營歛容深揖不敢褻虛監道童秋月暎
認得仁巖金篦安不欲大地人無明

劉連雲先生畫像讚

八十七歲叅龍氏不驕不奢信素履孝友任卹敦古始

有子永言思無已請肖厥容獨樂擬古堂今構樂何呂
脫巾露頂樂在此不寢而屏且禪喜方矜大領方外禮
如意一鈎代拂子廣長舌在如意底評古論今隱在耳
叅龍火德薪傳旨撥灰尋火火不死你說沒有只个聾
贈景陵韓先生

景陵先生面麻糜期艾之口能滑稽大盃小瓊總不辭
一引浮白鬼神駭

叶如諧

宅相賈家三日羈無有一日不

詼諧顏也語也醜而奇絕勝粉頰妖嬈姬對君形骨忘
支離忽憶九章之思美人兮言不可結而詒

李賓山松歌

黃冠萬事已如掃忽爾入林生舊惱小松無數不成材
龍子龍孫盡麻蘘蓬頭蔓委不作氣薰顙苟具培塿保
保此枝條千百年幾時鱗甲摩蒼天安能含吐風雲作
雷雨不如藿靡野草徒芊芊春生秋死無關係安於蹙
蹙人不憐

霜紅龕集卷六

霜紅龕集卷七

陽曲傅山青主

五言律

義蜂

羣蜂失其主浩蕩往來飛
苦螫撩人打甘心得死歸穿
花紅乍落入樹綠全腓燒
睫君臣淚無從濕道衣

庚午閏撤有懷卷自縊於奎光樓者詩以弔之

生平羞墮淚爲爾不禁流
白眼甘長夜青蠅弔暮秋
懸梁生有志懷璧死難休
魂冷欄杆裏依稀王粲樓

哭姪襄秀才

事了不相與情來無奈何公弘年不永務仲理能多雪
候怕時簡虹巢嬾再過露絲新樣綠獨少仲容配

病征

舊辛巳

青外響孤鵠綠中哀亂蟬秋心滿天地病客澹山川開
眼見村店支頤問水泉若能來野化真足飽烏鳶

盆蕉

惱人蕉五葉小染一簾秋夜雨清暑過幽田綠響留美
人雲不動草聖筆禁抽風至自搖曳無情亦惹愁

僦陋

陋一作破詩同

壁榻懸山郭

一作廟

村房僦陋栖蓬蒿仍舊逕簡牘顧新

笑風雨不題鳳槐榆長坐鸛得無華屋士爲一作我雪窮涕

西庵

禽向豈無句神山祕不傳蘆芽才一到幽韻與誰言亂澗鳴春雪高松綠老天西庵檢行李心失北溝邊

卽事戲題

亂囔吾書好吾書好在那點波人應儘分數自知多漢隸中郎想唐眞魯國科相如頌布濩老腕一靈摩

雪夜同文伯子堅太公伯渾驢背偶成

張刻題作如夢

一段寒山夢濛濛撥不開樹魂皴淡黑天影驪清羶酒

倦煙扶起鐘來雪舞迴暗香花未遠冰友韻如梅

小樓寒夜

昏黑暗人閒龍鱗不可攀疎鐘聞遠寺小月上高山白
虎馱經去青鳥取食還有兒常懶倚幽戶待風關

青羊菴

畢竟吾菴好三年忙一來七松盟舊矣二友快相隨

子宗

黃玉程
大伯醺

吾骨何方葬吾魂猶當歸先人塋已近死後得

依依

子堅先生齋竹

小院賓春色蕭蕭立此君自憐低顧影孤逸直捎雲縱

雨分清靄驕風緯碧紋綠笙吹別韻青鳳遠來羣

子堅書齋移得竹十一个

癖真何待醉春雨就佳期靜立瀟湘水瀾迴五六絲絲
聯煙與隙粉笑月偷姿韻疎多不事了得子猷癡

程仲示周讀書寓中竹三十个

青青三十个到是有程生雨雪幾迴死琅玕何能情深
根移不得苦節爲誰貞酒罷主人去捎雲月倍明

晉源逢示周

四年離國難兩月再留連瘦骨聊師席空囊損客錢烹
葵邱嫂得捧饌復哥圓共是明雙眼迴還晉一泉

病發示眉仁

蕩蕩乾坤病
痿痿肺臍收
三山逃不得
百藥度何投
速化終期盡
孤情死未休
奇文須斲發
風檄後生求
歲月如茲過
往來驢背勞
書行忘甲乙
花晷貯低高
乞食眞同亮
裁詩不可陶
黃鸝囀初夏
添得耳根忉

河漲

臺駘猶敢怒
雷電總無勞
平地浮槎起
獲頭五丈高
黃陵來裂石
白氣冒波濤
對面蘭村樹
希微只沼毛

看書

還是看書好
關門目也尊
無塵到銀海
有美一作共唐

園藥餌村居省秋心對雨言鶉襟容易癢不學猛奴捫
示兩郎

傳家文武幹元魏說修期亦似男兒槩終嫌志氣卑高
才生不偶落魄死其宜重念君臣義春秋自一時

村夜

凍月浸心白煙霄萬石吹彌天方睡熟獨立一翁癡道
廣計誰合情孤方自疑柴桑了生事未被輞川知

書扇貽還陽道師

師今年

戊子

整九十歲也人多謂師無道術師

兀一足腳脫脛骨出師靜處用功竟能肉下包

骨於今十三年矣師素祈雨多被三界尊神譴
之故遇此報然足以見師本領矣

吾師九十矣談笑益精神高閣蒲消日深杯酒漾春興
亡從世局忠孝自天真眼見松喬在朝菌尙不信

虹巢二首

老杏一株如虹作書齋在省西北四十里蘭村裂石廟前右側汾河出峽之口

虹巢不盈丈臥看西山村雲起雨隨響松停濤細聞書
塵一再拂情到偶成文開士多徵字新茶能見分

汾水初出峽遠心爲小欄山花春暮豔柳雪夏初寒細
盞對僧盡孤雲旋自觀飢來催晚食苦菜綠堆盤

問過虹巢主僧勸酒命題

虹巢久不過屐屨爲花登誰好居詩客相撩故酒僧燒
春深玉色滌硯發金星一筆山雲起高松綠雨冥

黃玉柳供茶

依樓新柳綠韻士採充茶玉隴歆春苦杯雲墮碧芽稱
無酥酪味澆此菜園佳三盞煩能滌滿黃一作冠簪杏花

西村

西村帶河曲十月停秋光柳擗輕黃雨蓮花老絳霜村
翁負朝旭野鴨靜寒塘紅飯慰調怒勸人新豆香

秋色

秋色淨河渚朝暎紅破櫺閑心臨字在老眼抱孫明空

闊歸高雁捉敲亂小鳴頭陀詩適到真率任吾評

五臺八首

中臺

中臺五六月積雪在經厨閱梵木魚瘦齋鐘麥燕腴霧
雲堆冷絮花草薦寒稊信是清涼地中煩獨不除

北頂龍祠

斗柄那伽藏連天海霧蒸非人來水怪締影鑿香僧潛
德誰能參噉心佛可盟蓮花悲相好身作毒龍曾

萬年永舊社

甚處堪雙眼佳人或一僧壺蘆空玉豉榔栗猛金鎧佛

性儘多狗駿神無復鷹波崙多少淚添結萬年冰

清涼石

疎磬可林冷雲根一片秋無情薰不熱有骨踏難柔眼
孔齊芥子肘弓量石頭堅貞見龍象施利領吾游

滴淋嶺

顛哉一杖癭滑滑滴淋嶺滴豔山玫紫淋濃石樺茲崖
黏雲不起溼斷鳥無餘一羽深深度花林抹兩鬚

梅檀嶺

問渡梅檀海招招甚處過子臣癡一結鐘板顛能磨法
許婢姍了疑當抖擻多金乘空萬有何外富蘭那

獅子窩

斜日澹金松松林響玉淙新蘭懽祝國敗寺泣神宗夢
薄明鐙閣雲沈黑夜鐘裂天鳴一作列佛子擊墻一生
龍

北山寺

金碧輝獅子名山敕署魏蒲團孤一作黑撮鈴椎一作

亂緇衣薰

一作薰

習何時盡丹元觸著違長旛工繡字來

往甚幡飛

一作丙戌
已龍飛

靜對西僧頓得

諸妄苦一遣對師都若逋容他原是我有待亦非夫世

界甘同處販依浪遠圖扳緣終不濟啼佛淚何奴

病間早起見西山

脩疎霜木表淺黛睇嬋娟朝氣忘衰暮西山方妙年境
佳不全外情至寓真緣無礙正爾馨辨才安所言

題梁樂甫畫

梁畫杜詩凍泉依
細石晴雪落長松

凍泉依細石晴雪落長松髣髴素心老微茫冷眼中伯
鸞風雨日蘆鶩水晶宮若个琴書解丹青亂長雄

爲袁生小陸作

陽曲人
國甥

米方南社許衣又北風掀飲酒誰兄弟朝陽共祖孫面
難生客掛心向故人言小雪天將雪人堪再姓袁

題九子故里

洪洞郭新字九子

必社文空訂誰堅赤石盟九子一個死兩變衆多能詩
骨憑人瘞遊魂敢道盜小碑題可惜不是舊盟朋

別正之

十朝留絳邑明日別文生千古汾申舊三秋孟又訂梨
花鐙下紫雪鬢眼中青西夕棲烏亂煩喧總不聽

梨花酒名

介山石乳泉

佛恩滋靜者石乳勅龍潭菡萏瓊茄引摩尼玉線甘惠
該功德八清徹法身三一勺醍醐足那伽不許貪

書胡季子詩稿後

汾陽胡庭字季子先生門人

風流胡季子花筆起河西豔選徐陵勝奇添李賀淒大
巫爲氣盡老腐但頭低公子爭裘馬文章有駉驪

碩公盆蓮

碩公曹
偉字

茂草暗雙眼芳蓮明一莖拔汚青子子承露紫崢嶸獨
可心之苦誰知一作能目以清似嫌千頃蕩太惹棹歌聲
芙蓉種無地菡萏寓花盆日月臨眞臭詩篇敢俗言水
仙孤對遠岳象靜觀尊誰測耕泥藕如龍螯不宛

蚪母祠三首

耳食蚪母者人頭喜一當有仇不敢殺黑夜須昂藏細
故何勝記君恩不可忘南來憶古跡國土署途傍

吾母能作佛心手妙丁庖想獲難奇中鈍根徒自勞菩
提寧諱殺痛快不容豪斷得無明盡蓮花可善刀
無心不負者七首可勝鑄母客於今在頭顱取孰先揮
戈中一快代斲手何憐已矣黃冠了皇天重與擔

借得居實驢善臥戲成

長耳耽高臥秋山強被鞍一鞭常沒卹

卹一作勿

三步亦艱

難淺草盤旋視平沙睥睨看五星猶未聚只見墮陳搏
牛鼻虧能走驢蹄許漫忙藥奚分稍馬山徑共相羊訝
醉何朝酒如泥又夕陽推攬還會起幸不索匡牀

禪巖蒲臺方外格二首

無情難頓至幽意一亭分綠霧上輕雨黑巒頽重雲秋
心健孤往水勇轟三軍雄劍恥未舉碧靈知有文靈一作青
半山氣肅穆榛徑通荒宮忍矚一丈石礪砢孤章松石
莫測子雨松奇多雄風雲根對霜幹一我愁龍鍾一作無窮

睦家砦限韻

蜿蟺林巒白瓊龍躡石瞑空濛常霧雨灌薄少青天樹
夏高巖寂壺觴半日偏有情山未免爲我淚嬋娟

崔嵬砦限韻同居實

冷壁高禽絕香岑小麝通人忙虛惓惓山靜老沈雄龍
象張天眼獼猴弄棘工莫虞逢不若魑魅入觀空

太行

紫盤天井上青幕太行鄆風雨詩何壯岡巒氣不奴爭
韓來破趙報楚去趨吳臨老河山眼蒼茫得酒壺

葵老惠訪病不能晤期霜紅再理前約四首

平定張三

謨字日葵明
大理寺卿

處士孤村臥先朝大老來沈綿期一豁秋氣重三台土
木闌干倚星雲杖履迴藏山寫惆悵黯黯欲情

一作開待青

伏枕悲臺閣嘉猷鑒御屏爭詹義豸直議射翼龍靈朝
野漢廷尉絲綸晉典型聖恩何處憶痛切有雷霆

迴首雲霄慘龍髯不及攀錦裘少年熱華髮老臣寒瘦

蹇馱分穩幽山徑客寬杜鵑聲若起松木恐難食
無奈還城市相期只壑邱涕洟三秀草矍鑠一虛舟簞
盞忻時棄藤蘿勉月留黃冠疏藥裹紅葉下書樓

傷垂雲墮驢

此邦白意士真个不多除隱痛常私語同心逕發予杯
盤誰不可面目竟何如撥置休深理看雲忽墮驢

哭范垂雲二首

吾軍亡一范豈是甲兵期古道誰相照時文獨不魑諸
生惟得雨先死子餘奇自解無知樂泉臺怕有知

死生誠旦暮先後未須遙語敢幾人盡心枯一个凋廉

隅如不立肝膈覺孤標酒醕西郊草榆關氣爲消

也居許小樓避暑

白石樓前明隱士李鎮建先生至曲沃數寓此

一命真如梗三年不結廬今來白水曲借得小樓居常

偃方牀席時攤短佛書高雲與疏雨青靄主情俱

曲沃志作

鎮日共

樵漁

同居實樓寓數日

小樓才許借

一作剛借得

白禿可

一作喜

來過靜對昂昂鶴悲

懷

一作聽

究究羅日飡恬鹽米夜語淡星河將子且潦倒

孟山鬼見阿

白臚二首

卽居實白子嗜酒鼻臚紅又盡禿其髮曰白禿別業在平定州七互中

白牯吟有會不苦琢篇章性嬾真成癖才高簡見狂秋
深霜菜圃雨寂浣花堂筆硯共啼笑妻兒少稻粱
七互巉巖徑騎驢帶酒行村翁常共賭葉子不圖贏本
莫知愁死人翻代慮生尋常難可入點漆一雙睛

雪林二首

雪林張姓陽曲
庠生亂後爲僧

全不關蹊徑靈根動與謀知誰能出世愛爾未僧流柳
杖涼孤雁金園邈斗牛偏教重七夕鉤慧入鍼樓
獨我憐和尚全渾酒共茶安居看左傳閤淚誦南華者
箇雖疼痛終然勝木麻赤城評得是益覺此人佳

徐某三首

袒腹荷包裏挨頭仰瓦箱詩餘雄北曲鎗老怯南塘白

跼應羞伍黃須那值當非徒何割席不作省移牀

歌北曲妙

絕胡敬德餞別立英一齣
真動人聽大有萬人敵意

薄薄三杯未揚揚一弄前逃生忘釁勇駕死乞人憐帖

拈詩旋備矜奇詫偶然老僧聞見寂失意枉狂顛

使相猶吾黨徐州走不傷再來張儉跳到處孔融望喜

道圖形構甘爲負義行坦公眞落得如是解金剛

寒日過濟字見鈔左氏傳硃批細讀

濟字汾陽人

濟老六十四霜鬚秉燭勸富兒飢不顧文字凍能書脣

黑啜餘墨顏醅點古朱小樓高鼓腹日厭大官厨

憶崔季通

半枕夢不就四郊雲亂生

雪崖曰十字季通句也季通亦袁山門人

誰云十

字少遂欲五言城不作詩人態居然靜者鳴亭皋看木

葉今古到吟情

筆硯誰同調尋常說泰雲再來阿六好餘外不三人絲

玉文心細

袁山先生評語

交游白眼顰暗狂多不覺七十老難

磷

危坐常終日花房寂不扃清齋留共飽老戒不時叮半

月疏相見寥天笑獨冥一經紛後學三傳失先生

共短先生躁誰知近死恬道心原運任持誦不情黏少

閒云病妙微嗎示我厭反眞果何處老友再難添

宛在二首

宛在明明家盈盈不勝遐緯林渺無路港口任蘆花微
從古寺下淺絕水仙斜秋心獨有會孤鷺停清沙

戶外潭眞碧樓前燭不紅佳人愛幽靜老友吟立風石
冷支機穩秋明雲錦空離觴高柳下回首謝芙蓉

無聊雜詩

己丑寓平定馬軍村卽事有拈

無聊月云九紅信託筇詢百草靡五色雙梨殷半村秋
光殊自豔俗眼但知春暫得喧卑辟疎礎亦可間

藥嶺負秋色石樓登告勞黃冠非獨懶白禿亦孤騷豆

結偃煙盡柴門閉日高村翁問寒藥茶果致胡桃

隴首兼搖雪空波浴鷺鷥人誰堪澹蕩詩似許黃緇句

取渺無所情生微不遲憂思常萬里卽事得題羈

火齊何曾解冰臺偶爾藏西隣分米白東舍饋一作梨

黃食乞眼前足醫無肘後方果然私捧腹笑倒鵲山堂

州有鵲山山有越人之祠

上城下城古嘉山嘉水邊艾郡自秦漢榆關亦趙燕風

流湮古昔碑版習星壇齷齪金元士州人噪六賢州有六賢

堂祀趙秉文楊雲翼元好問王構李治呂思誠

卸門支木榻放月當一作煙燈弧矢無窮怨楞嚴不了

僧西河慙二義

曹偉薛宗周

堂北炯孤星甘作阿奴老霜鬚

已亂莖

振玉案二義似謂王如金薛宗周舊注殆誤

山水須人洗人須眼界昂先生譽酪美後輩昧茶薊容

邑劉因貴懷州許魯彰秋風三百里榆社竟差強

鑒糟何所用天上等人閒雲表無奇節仙班亦覩顏沈

吟送白日意氣動秋山老子終年讀和同不可攀

奈病不修藥憐秋常上樓岡巒來鬪瘦物色共分憂紅

葉翻飛下黃花矍鑠頭巖林無氣槩王霸爲兒羞

稽生豌豆好客作瑟珠供秋入幽牙菜甜回霜露沖野

田隨興得場圃謝爭傭香味空過眼拮據意不封

玉米得未有柴門杵白瑩立苞渾秬黍白粲小香秔屈

子淚無盡陶家瓶可盈友朋餘蕙畝乞種勸深耕

玉米一名

穀黍稷似黍米則稷蒸餲甘香擬乞種屬友人種之

雲林白馬貴花史黑驢閒石逕時遭墜青鞵暫得完長

鳴紅樹裏緩蹠翠微間生怕嫌吾俗虛哦似有刪

花史母君

得危疾余設醫愈之每往來皆以其所愛黑驢馱之故引雲林白馬

苦酒高難問圍棋低可媒燈花殘局罷香菊滿瓶開志

慚鎡鄒下軍酣琥珀回復仇愁殺我敵國有新醅

數數贏得

友人苦酒

三五瓶

山市肥濃絕秋容澹薄厭水沈通鼻鈍花蜜獎脾廉陶

范家多米脩齡食不甜寒貧原有性祿命那須占

合絡出纖手虬蜉糝太妖遙微白鳳隨羹失錦羊臙滑

嫩難勝箸晶瑩不忍挑紅裙花戴雪風味想如歧晉人謂歧

麥爲虬蜉麥葵之名也又語云綠襖紅裙帶白花

三白舊名酒一枝今野花醉眸披病葉蓬鬢開昏鴉絃

急隴頭水飲闌樓外筇胡旋叮漫舞綠怕小蠻靴三白連莊

妓也好著白花

叱叱樂平縣山環水抱之鳳毛曾有種喬公龍象久無

師靈彩秘圖府古文鐫戒碑河關逢蕩子獨不掉酸詞

樂平人士戒讀書文詞鐫有戒碑

城荒抔土砦山逆太行枝白氣沾漸急縣城外沾水帶三面紅燈
苦酒支西南瞻潞子東北走湖兒上黨中原脊英雄今
是誰

地主尋天水深秋頓小年驚黃過葛聖羊白進羅賢冷
客開心接春牀放足眠圓林松嶺下還許共逃禪
此客防難惹平原且瞭輓邑中風俗樸方外道流殺潦
倒蒙山笑顛狂皋落嘲與君試商議謝絕到全交

塵識卽事

古佛圓光界村翁編石籬堅文翻辨圓薄酒寄言卮萱
樹支離字膏蘇任命基不驚常一鷺霜月在冰畦

自青龍驛過靈泉寺

一作寺遠

寺遠吾儕僻秋高獨逞盟
柏來花眼翠霞上寸

一作老心

明淨界悲文藻威河響
甲兵顛預僧榻者

一作借

壁壘夢

中一作經行

維遇早眠

嫋殺嬋娟月林端十五圓
冰尊不救倦葦泊只添眠
惜別秋燈地貪歡欠夢闌
燈花休結蕊張祜惹情漣

瀑池

琥珀苦常煖林塘冬不寒
聽泉遲白日言浪許黃冠柳
未春三候鶯交五夜闌
舊歡真可戀折腳借鎗飡

庚辰冬欲雪同先兄合龕待之烹茶忽復十五年

矣前日欲雪憶一過

霽靄壓四壁星星流素蟬窗光疎瑩色

一作瑩引瑩硯露薄螺

一作疑

鈿鷲振

一作瘦骨

遙分峻鴻經急就仙

一作茶香急借鮮

不愁

寒欲

一作即

死大雪是吾天

載賡大雪是吾天四首

大雪是吾天黃塵壓不顛深簾餘斷竹耐冷不裝繇地

未菩薩煖牀非屬國擅奇功想淮蔡酥酒一樽偏

大雪是吾天冰壺夜懶眠梅花孤嶼夢柳絮小春園凍

雀擘椒顧饑鳥高樹顛仁心領阿弟減米撒簷前

大雪是吾天彌羅素炤然同雲高恹恍震雁冷連翮松
竹靜神起漁樵野性全好詩在眼底慵鏤六朝篇
大雪是吾天圍扉凍玉煙薑茶領辛苦筆硯靜卑喧合
眼開眼白生心死心蠲叮嚀休掃卻參作太初禪

我想

我想真奇士經綸難浪名憐才有佛眼文雅不書生
海微風彩潯陽仗鉞聲丹元留不去夢寐顧中丞

獄祠樹

獄中無樂意鳥雀難一來卽此老椿樹亦如生鐵材高
枝麗雲日瘦幹能風霾深夜鳴金石堅貞似有儕

木公居寶獄祠中作伴三月矣病刳兩兄將行面
之

皆違老母久吾所不忍留生死事只爾友朋意何休西
河薄收麥上艾云有秋深以吾爲戒承歡日日謀

紀夢

老子知無用眉兒自審才一枝鐵藕上千葉蓮花開自
是心菡萏全非意蘚苔五千言面壁只道閉關來
祖炤大可惜無端離崛嶠未曾經女厄儘好著僧衣破
寺何不可長松亦莫非拖將口尸去流浪今焉歸
咄咄箕陵夢于今十八年明夷丁此世暗覩異前賢茶

苦甘三月秋明淨一天朱衣成罪案洪範却無篇

秋夜

秋夜一燈涼圜祠眞道場教兄跌病骨聽弟轉金剛佛
事滿天性文章對法王寶蓮開鐵藕兒夢亦非常

山寺病中望村僑作

病還山寺可生出獄門羞便見從今日知能度幾秋有
頭朝老母無面對神州冉冉眞將老殘編覩再抽

感

感不勝憂樂情微證弟兄佛恩雙點化天性共關生老
母自然喜承顏相至誠諸郎應此後凍餒益親貞

不死

不死良無恥還爭魑魅光有情誰見識無語獨肝腸內
典極知妙諸心不可當燒春掀孟蓋病葉入連邦

李然周極可敬遭亂入山自墾窮壤而食十指礪
何如椎笨田父知義知時河西佳人也爲詩贈
之云

孝弟力農畝求兄之偶難胼胝沙塞瘠吟嘯隴雲寒我
荒卽我土誰帝復誰官無終老田叟逕用伐烏桓

伯渾藥菴

王孫本慧根深穎不多言艸昧尸饗母村嵐開藥軒方

勤翻古冊生恥向今尊久眎亦無樂微情發妙論

眉兒觀風塞上來有詩

朔氣健遊子新詩動乃翁悲歌猶趙燕聞見不彫蟲
海賁先志神州痛此中傷哉吾老矣永矢作愚公

樓夜四首

汝當未必信情所自專專不是噉名客猜生形謀先折
衷向清夜悔遜指蒼天月澀勞人毘心翻費力眠

冀豁來樓上情連到處深亂愁齊一極夜樹不分陰浩
蕩何斯願誰明抱寸心實沈難指正矢月聽哀吟

誰能怨不歎雨夜強樓闌側月敢驕滿輕飈生性寒苦

搖林影薄不信鵲巢難物色今如此牽憂豈一端
悠悠聞道路一映上流九事產營家易文章負荷難神
明生骨肉丹彩受心肝知子莫如父吾何爲不歡

再遊蒼巖限韻三首

亦是千尋壁人龍偈宋纖黃冠隨處好赤閣不先占騷
賦才無盡江山會與一作興會添一天秋色楚空翠下湘簾

山情常自苦過去未能忘善逝何時證幽尋此日忙樓
欄老紫蜺鳶帶女青霜句縛巖之裏還如郭注莊
雙橋連東峽再度亦經年筆硯仍兒戲仙書念子涓山
腰樓上客立首石旁賢夢逐青蓮老神遊八極埏

雪夜

密雲壓萬籟蕭堂流一鐘
鬢鬆石磴老夢寐蘆芽松靜
室封寒色空觀信短筇
那容負苓者戚戚憂黃農

老足

老足秋能健朋遊嶺亦豪
眼當孤閣放身已百盃
高霜壁搖朱杞風簷落白蒿
生平望東海一釣有連鰲

懷融苦酒遠志忽漫六首

文彩珊瑚朽沈絛琥珀憐一尊
傾紫海高韻滿青天俗
美羊羔共心同橄欖偏繩牀
膽半席春夢抱甌眠
眞欲朝甌拜心心領苦薺客
同村客盡分注小瓶藏移

席凌花豔懷書濟月涼尤宜酥一餅投爲老親觴
送老眞須酒掀盃還展書神仙時有字脉望豈無魚經
濟山林拙浮沈日月虛糟邱何處可兵喻定非迂
羣離誰白社僧榻舉紅卮豈是坐忘候無聊上頓時如
來能度我權實許偏師一醉春寒覺晨鐘掛老眉
有仍苗裔好嫵媚自安豐却笑河梁霸何如琥珀鍾向
衡桓發在揮手幕翻工百萬撈捕得推車付酒傭
俄然翻杜句觀酒向身慵麴蘖幾時辦龍鍾今老翁糟
牀乾菊月雪窖信春風總不妨來再勞勞奇字攻

與邯鄲任尹四首

今日任公子滄浪罷釣竿

起用李句

閒關留七尺寤寐考三

槃念彼幽冥友言會慷慨歡洪波亭上酒一滴酹闌干
自信無仙骨黃梁夢嬾尋一拳擊默默連抃老樽樽豈
遇聞鷄侶其如運甓勤叢臺荒朔漠戎服久纏身
四七阿陵傳元功在信都如茲名將者豈是爾先乎實
奪王郎據虛聲子路俱千秋臺不遠河北氣猶麤

老泥廉公語終思用趙人邯鄲好都會廝養亦精神却
喜遊山左還要過海濱岱宗愁一攬花眼決東秦

草灣河

草灣三百里濁浪去朝宗智勇終形勢威儀自肅恭危

檣看子裾

句似有誤字

特達撫臣衷多少滄洲句吟情轉不

工

與眉仁夜談

議論先生怪文章上帝俞渾淪誰達孝封建亂經儒禮
置崇三恪錢爭復五銖子南三十里漢武近虛邪

帝律須天定皇立不著書卽教咨稷契亦得告唐虞禮
樂何多士崇高盡獨夫孔門羞五伯一節有堪予

何必許家第乃云多閱人長空看高翼一去杳無痕世

廟私王號尼山自聖尊唐虞眞道士龍德脫其身

定州道中

定州一作長安

不逐長安俠長安歲再征旱

一作悍

鷗平地起危鵠薄雲

聲無復劉邦鼎猶傳紀信城霏霏官路柳顛倒縱能生

卽事

筆硯眞罪業未了筆硯情兄弟連寒榻秋冬共佛燈戲
禽因病歇高鴈貼雲鳴張仲於今在

思孝曰張仲字還孺子先生內姪

爲寫孝經

聽道學者歸寓作

依經無古佛頓悟有仙儒故紙亦罔罟癡人爲佃魚甲
兵談得似羽扇執來殊諸葛眞名士風流不煩姝

霜紅龕集卷七